

四庫全書

集部

欽定四庫全書

集部

緣督集卷一至四

詳校官庶吉士臣謝恭銘

主事臣呂雲棟覆勘

膳錄監生臣黃鍾

膳錄監生臣嵇承羣

欽定四庫全書

集部四

提要

緣督集二十卷

別集類三 宋

臣等謹案緣督集二十卷宋曾丰撰丰字幼
度樂安人乾道五年進士官至德慶太守真
德秀幼嘗受學于丰及執政奏取其集入崇
文四部當時嘗板行於世歲久不傳元元統
間丰五世孫德安購其遺集得四十卷翰林

學士虞集為之叙謂其氣剛而義嚴辭直而理勝得於易之奇詩之葩其文今見道園學古錄中然當時欲授梓不果至明嘉靖間詹事講始選錄十有二卷刻於宣城卷末有萬錡後序稱摘其尤者存之今觀所分諸體如五言排律類中惟有排律一二首餘皆五言詩七言排律類中皆七言古詩無一首為律是古今體且不能辨則其去取乖謬大概可

知蓋事講從羅洪先游日以討論心學為事
文章一道非所深研遂使丰之菁華反因此
選而散佚殊堪惋惜惟永樂大典編自明初
尚見丰之原集其所收錄較刊本多至數倍
今據以增補乃裒然幾還舊觀佚而復存亦
云幸矣丰仕蹟不顯頗以著述自負集中如
六經論之類根柢深邃得馬鄭諸儒所未發
其他詩文間有好奇之癖要皆有物之言非

膚淺者所可企及亦南宋一作者也丰晚年
築室自號曰樽齋故是編一名樽齋集見於
宋史藝文志今從虞集所廣仍取緣督為名
集序稱凡四十卷而宋志乃作十四卷盖刊
刻傳寫誤倒其文今原目不可復睹謹據所
存各體以類區分共釐為二十卷乾隆四十
六年九月恭校上

總纂官

紀昀

陸錫熊

孫士毅

總校官臣陸費墀

原序

緣督集者故宋德慶太守曾侯丰幼度之文也侯撫州樂安人登乾道己丑進士第積官至朝散大夫叅知政事真公德秀幼嘗學於侯侯歿真公志其墓石納窀穸中不得見而侯之孫焄以蔭補官歷鴈汧海口兩監鎮調平江府節度推官則由真公念舊而推引之也二百餘年而書亡國朝元統初今監察御史前進士變理溥化來監其邑詢求其鄉之先生舊人得其族譜兩卷故翰

林學士吳公之所叙也又命侯之五世孫德安購其遺書得今集四十卷將刻之而變君召拜御史書未及成後三年德安求予叙之按樂安未置邑時地屬廬陵之永豐其先在唐末五代時有異人善相地者為之葬而子孫果蕃以盛如其占江鄉好事者人人能道之往觀者至今車轍馬跡不絕於其里其顯者則莫盛於德慶矣侯方未第時自著其族譜叙以為遠不及溫陵宣靖公父子福德功勳之盛近不及南豐子固兄弟文學名

位之著慨然有自憤之志不一二年遂策名大廷其志亦宏矣哉予得其所欲刻者而有以見之其氣剛而義嚴辭直而理勝其有得於易之奇詩之葩者乎取譬託興傑然不溺於風俗山川磅礴雄偉之氣蓋有以發焉夫物之精華久而不滅則有神明之助者矣一編之書獨發於五世諸孫之手殆非偶然也德安能儒能醫則文理之美陰德之厚尚有以昌其書者乎侯登科之年則我先忠肅公入相之歲俯仰今昔故為之書虞集伯

生序

欽定四庫全書

緣督集卷一

宋 曾丰 撰

賦

桂巖賦

并序

運使馬少卿于聽事之東葺故屋為宴坐所
疊石為山植桂其下揭曰桂巖賦為發揚妙
致作也

陽星之精糝入于月故月窟無凡植榦桂樹之婆娑夜

影耿兮澄徹月桂之種下墮于粵故粵壤無凡茁翁桂
嶺之葱蒼秋香撲兮清絕桂嶺之別是為羅浮下有巖
兮谿訝上有桂兮翠峯花縹緲兮粲夜葉茸茸兮鬱秋
小言之廣東之蓬島大言之江南之瀛洲有偉兮異境
孰移寘兮公之屏天花開於逡巡石笋拔乎俄頃不墨
不素寫出月中之真非水非鏡照見天上之影豈公身
遊月宮手襲桂華心欲得之而植于家決鼻銜其核望
舒擢其芽授之使歸種為生涯者邪曰不然公有斧修

月莫指其痕公有石補天莫捫其罅連根斫桂端乘修
月之餘平地起山亦出補天之暇元勲尚爾其少稽妙
用輒茲其豫借左擘天台之崖右塞合浦之溘斬雲骨
與煙苗幻風軒與雨榭五丁猶服其敏強六子不辨其
真假決鼻望舒公何彼藉或曰岱輿之嶺羽人所舍厥
植有桂其鬻無價子累累兮雌珠而北璣香馥馥兮
僕蘭而奴麝公聞之圖詣覓觀懼成枉駕叱夸娥兮疾
趨麾禺彊兮橫跨挾彼岱輿而西頓于牆壁之下夫如

是則盤古公徒巨靈公亞山川繇我而峙流草木自吾
而榮謝凡囿氣形率歸造化夫修月與補天又特公之
細者也雖然至人無我大道同流寓意出機猶未免混
沌之鑿反身內景得無損汗漫之遊蓋摸索公之宵次
自有一壺與一邱了知假合誠是贅疣聊復當丸弄而竿
戲豈真為蜩掇而瓦振繼自今扶天柱於無底絙地維
於不周舉首戴山之力大試橫身負河之志畢躊躇紫
府而思凡告玉皇而歸休親戚故舊勞苦咨諏公其倒

羅浮於囊中傾岱輿於筆頭以示之謂吾生宦游之所
滿拾而飽收者如此而已若其笑乎否哉

海栢賦

壽益公

南極清老人明稅層霄墜重溟化作石質流為栢形軀
最爾兮倂僊氣浩然兮崢嶸天裔兮降材帝饒兮予齡
得喬松兮稱弟與大椿兮爭兄甲子相忘曾何有于寒
暑乾坤自大胡為乎厭薄我蓬瀛蹢躅然從下士以求
介紹謀與上公而為朋哉公眡栢栢眡星蘭臭氣味歲

寒典型體不同而道合貌未接而神迎栢遇主人兮眉
黃公獲良晤兮眼青契若疇昔懽如平生謁平園兮不
獨往問訊華隱兮先登方將及身之孤高乘足之雙輕
駕脩脩馭泠泠相襲籥而上青冥也坐客俱驚起攬公
纓非岨輕舉有衰老成何當肯留上為朝廷之重下為
州里之榮公徇客兮以情客壽公兮以誠有木名榆受
氣玉衡亶哉彼栢星氣蒸也惟鍾于栢物中之亭亭故
鍾于公人中之錚錚有士姓李受氣長庚亶哉我公星

氣凝也惟公于星蓋星之精故公於人乃人之英泥凡
丹田與造化爭却老逃艾還孩反嬰華胥之城空同之
垺恬寢愉興娛坐嬉行忘其為長生

墨竹賦

中都員光
祖所寫

我家江南種竹遶屋茲僑于京無竹而俗欣見員郎吐
墨為竹不根而萌不笋而莖盤礴之頃天生地成不籜
而節不苞而葉逡巡之間神造鬼設謂春滋邪外姜其
形謂冬凋邪中益其精瀟瀟瑟瑟濛濛溟溟未霧露兮

如濕無風雨兮若聲顧壁間數竿之可意與渭上千畝
而爭清拔我汨汨納諸泠泠府寺之跡既浣而復潔利
名之骨久醉而忽醒惟竹太孤孰同保社鳳馴栖而思
凝鶴矯立而神化有固可嘉無奚足訝所少七賢坐於
其下七賢面目今莫識者視我形骸隨意而寫置之竹
間以伴瀟灑毋謂今人之不古安知真相之非假

蠹書魚賦

嗟嗟曾子貧哉其家倚富哉其書粵昔走帝鄉而干祿

倚爰予書倚作踈棄而去去而歸倚匝半期其有餘一
日發笈出書倚手欲披而莫扶糊偕楮浸腐倚陰濕倚
出菰楮偕縫雨不相屬倚字畫倚子俱詰其蠹吾書誰
倚有物焉曰魚乎魚而前倚訊問其辜曰微乎女之貌
眇乎女之軀爪牙倚匪豹匪羆角觚倚匪鸛匪鸛胡為
乎敢尔齧吾之楮啗吾之糊寢而蝨賊吾孔孟之遺訓
堯舜之典謨按三尺與九章倚擢髮不足數女之罪顧
女最然之形倚蓋不勝誅余將淬劍以戮女女其何辭

以對余若其辭耶則開女以自新之途不則決不貸女之命於須臾魚也哀而乞憐曰公且息一時之怒待吾盡其情以懇倘其自飾以游詞然後伏公之刀鋸初吾之營營猗非為口腹之故蓋聞仁義之勝乎膏粱猗可以供吾之啜哺故潛身入其間猗欲求其饜飫奈何哉其口不識味猗翻為書之蠹雖然吾獨小蠹爾不幸為公擒尚有大蠹焉公胡不之慮曾子驚曰今安在哉吾其往捕曰其來也代久歲深其衆也雲屯蜺聚粵自孔

墻失護厥徒橫驚瀾茫其正路出入其異戶戕穴吾春
秋猗斷斷乎公穀之據穿窬吾風雅猗拘拘乎毛鄭之
序書猗膠於秦誓易猗桎於象數又其甚者韓非師老
剝天下之肌膚李斯事荀壞先王之法度信夫千里之
差初者起於跬步不然胡不見墨子悲絲莫知所措楊
朱泣岐傍惶四顧原二子之初心豈欲無君無父也耶
由是觀之蠹公之書彼蓋其尤者也公不鋤而去而獨
歸咎於我何歟縱云在我蓋出於誤於法猗當誅於情

猗可怒曾子聞而驚曰吁女之不幸猗至此哉宜其為
人之憎惡安得聖人出而鍼其受病之處昔者嘗聞原
壤之弊也必至於為晉為梁故孔子為之拔其根之固
師商之弊也必至於為楊為墨故孔子為之開其所未
喻嗟女蠹書魚猗惜乎不孔子之遇顧我雖非孔子猗
焉忍坐眎其僵仆爾蠹書魚來吾語女道學有捷法聖
門有真趣軻也豈盡信乎書參乎惟一唯之悟繼今而
達尔能糟粕之捐猗醇全之茹則不惟前非之可贖猗

自得之學云庶不然豈獨為人之憎惡而已哉甚則又
重遭其擊拂也魚謝而退曾子歸而嘆曰悲哉魚之蠹
吾書也不過乎文字之殘人之為魚也併予其道之數
吾為之懼故為之賦

楚詞

祀蠶先

并序

人以蠶兮為衣蠶以桑兮為糧柞櫟棘櫟宜
無葉兮可食之今蠶嗅矣訖不嘗是以未即

治蠶先期治桑或問蠶祖則曰園客之妻吳
縣之婦抑嘗攷之赤帝之女學道得仙巢于
桑樹憑桑而靈享蠶者昨夫人生理繫桑與
農寒衣兮饑食用異兮功同通郡縣祀稷為
於農兮有功彼蠶先雖未廢自后外其孰崇
厥功同其祀異幾何不與世之所謂受施而
忘報者類大事難乎文拘曠禮可以義起祀
彼蠶先由吾家始又從而為聲詩以相傳庶

幾遍區夏而皆祀其詞曰

旦穀兮辰剛聿蠲衷兮齊以莊孔偃兮再慘擊厥拳兮
三迎將飛廉掃兮浣者以清赤松洒兮溽者以涼靈之
來嫖嫖兮若翔兮上靈之下婉婉兮若倚兮傍靈之趨
躑躑兮若參兮前靈之坐盤盤兮若据兮中央乃陳其
太牢侑以兮糜餽饒柔兮膏肉腍鼠腦脆兮糜薌靈其
盼只勿虛我祀只世傳沙宅兮亥地泥屋兮壬方聚種
南舍風來兮東廂夫是謂兮宜蠶徵其如我教兮未詳

顧蠶兮消長惟靈兮弛張紛再登三熟與四出信吉利
而蓋故常雅志兮蠶事匪徒製兮已之裝絲吾欲繫象
兮俾不折繭吾欲投火兮俾不傷于以試兮允哉驗殆
將補兮舜裳靈其炯只勿虛我景只蛹有種蛾有秧圓
嶠兮色黑寒國兮色蒼絲一指兮大繭一尺兮長蠶有
兮彼異何當界兮千斯箱靈其飲只勿虛我企只

乞如願

丙午歲首有商叟過余曰如願叟叟嬖醜也逸不知其

姓某或曰喜母之女歡伯之婦得自青洪君之手至自
彭澤湖之口嫵奉兮叟左婉承兮叟右叟歡兮授以豐
叟薄兮授以厚假非玄女橫縱兮坤六倒顛兮乾九安
能轉叟之凡百竒為一切耦乎委以赤心期之白首歛
於晨興潛以形走門有守戶有候其故縱之守候是咎
守壘候茶睥眄嗟吁奉職警柵曷嘗少踈猶疑未獲未
出而廬爰搜爰索迺籲迺呼則趙趙趙趙闖於東窳糲
糲糊糊霧於紫姑彼紫姑者能文知書叟不識字勢難

動渠公善形容以乞焉彼宜響應以歸歟喜不自禁則
節文而為歆曰來紫姑識甘有兮松醪糴以兮膠餠紫
姑來下盼余馨識辛有兮椒醪糴以兮葱餉紫姑來下
盼余馥識淡有兮桃醪糴以兮柏飴紫姑來下盼余醅
識三薰兮三酹夫有懇兮其敢昧久求如願兮顧茲在
幾為余兮割愛識來紫姑伊媿且媿初音識凡借顏色饒
髭鬚識厥有李赤豫讓范睢識若乃鬼殘彼非刑餘識
彼所有若所無緩急自可相須識詎必如願而弗以乞

余識羌紫姑形不露脰而有影若拇殆余授邪羌如
願聲不露喙而有響若呌殆余詎邪公其願貴或願
富邪貴豈能玉余骨使莫腐富豈能永余肉使不臭邪
文章可傳金石不朽要貴其精須遲以久余心所願汝
假之壽應聲譎似曰有有

祀南海神

赤精炎官兮神一靈兮幻只鴻澤龐施兮神一念兮胚
只上清委照兮神功行兮簡只浩劫彌沙兮神慶休兮

綿只太虛窮窈兮神徜徉兮栖只瀕海渺瀰兮神漫浪
兮僑只沆瀣溟滓兮神固自兮飫只肥腴芬薌兮神
孰何兮肸只昏頓顛冥兮神惻怛兮矜只顛連號呼兮
神恍惚兮聳只君蒿悽慘兮神憑憑兮下只狎猥媒嬭
兮神恢恢兮涵只譟曰蒙兮景只有嘉斯穀兮羅只有
旨斯醕兮醕只神兮歆只有皎斯衷兮監只有蹇斯數
兮翊只

擬雅

途歸遭雨

有序

我歸遭雨為王事也恩重身輕無尤怨之心

焉

莫予我食食于公庾我歸遭雨我不以為苦也莫予我
衣衣于公府我歸遭雨我不以為苦也莫予我居居于
公宇我歸遇雨我不以為苦也

有祭

有序

有祭為益公微發也公得玉藥以其似道而

卷一
酷愛之人莫闕其意故作是詩焉

春風穆穆有榮若塗

音沃

獨出者英旣亭旣矗孰刻之玉

公昕翫兮忘飭春雨涔涔有榮若琳八出者須旣挺旣
參孰點之金公昕翫兮忘簪八表一裏蓋九州之云爾
英須如之亦孔之隋一中八邊蓋九州之云然英須如
之亦孔之津九疇之中屹其皇極彼孔隋兮中兮獨屹
九州之中巍然王畿彼孔津兮中兮獨歸中兮者得所
傍者得侶主董其臣臣危其主他華豈不須莫如此都

與天地合自然之符他華豈不葉莫如此微與君臣合
自然之理游僊感止心兮朝真游貴感止心兮拱辰天
予平園僊愛之璚英左英右幾須卓立公豈不懷嚮為
輔弼天子平園僊愛之瑛英前英後幾須勃興公豈不
懷向為疑丞天子平園僊愛之璵英與英涯幾須用奮
公豈不懷向為藩翰有銜大恩不忘至尊夢遊魏闕覺
在陶門胸中有兮樂國天下無兮平園華徠自北悅公
之色公飲酒兮興之於適欲老還童與華同澤華闔自

春怡公之神公賦詩兮意發其真陶情歸性與華同純
純極兮生白白極兮招涅矯入太素文反於質馴歸太
玄白守以黑公同乎造物

九月

有序

壽建公也九于數為老陽老陽應時老人應
期自然之符也

九月庚庚金風颼颼菊之有之強名金精九月庚庚玉
露泠泠菊之有之強名玉英精英于菊薄昇其羸公于

精英裒其大成

精英攸結霜莫之折小字女節公生烈烈精英攸凝霜
莫之陵小字女莖公生亭亭女莖曰咄挺其自拔涵濡
天涯吾不如女葉女葉曰嗟匿其自奢漸寢天和吾不
如女華

彼女華者有都其色公所養兮亦孔之澤彼女華者有
都其香公所立兮亦孔之芳彼女華者有都其味公所
調兮亦孔之旨

八月擷葵十月擷梨匪蚤伊遲菊在中兮有神有奇于以却艾寧復云耆八月擷棗十月擷稻匪遲伊蚤菊在中兮有化有造于以却老寧復云耄

既浣之後未望之先有誕初辰有秩初筵公嘑子孫爾來吾前有觴勿他醕維菊可以酒飲之長壽有脯勿它烹維菊可以羹餐之長生飲少輒酣餐少輒飫公舉其步謂殆神助客搯其屨謂殆僊去惠然肯留永與國為

柱

公邁何邁序

送大學尚書劉公帥蜀還朝纔過家又帥潭也

公之西矣蜀人是喜都人是囂詔予華袞亟哉來朝彩熊既稅彩鷁既發月逗歲遒竣其未達都人曰嘻吾國君師欲猷欲為未得良毗公歸何遲

公之東矣蜀人是戀潭人是羨詔予油幢亟哉往殿列城既傾列騎既迎日裴月徊倘其未行潭人曰噢吾家

耄孺不襦不袴莫能略顧公來何暮

公之南矣潭人是抔洪人是留議奪朱轎亟哉還休御
者既剗餞者既輓俄馳頃驅僦其未返洪人曰嗚吾土
山川有真有僊可伴長年公邁何邁

公之還

有序

為有詔以桂帥李公歸作也

公之還謂常還今獨不謂公害著儒冠學其簞矣于聖
之關仕其邁矣于鼂之鼎孰驅我忙兀涖之湍孰駕我

熊元桂之岍交中互外迭來更繇壹心若力幾暑且寒
于何景遠于此懷安四三皇王效何當完九八元凱志
若為闡斯夢斯環兮儕我閭闔之門兮

公之還謂常還兮獨不謂公害我粵冠上意我東南憂
誰寬伊素若赤維翰維蕃校妥爾寢毗恬爾食伊碧若
朱維幢維輜外藻曹幾中渠殆單肆是蠻狙申之瘴奸
裏之知之寧是弗言上之聽之寧是弗嘆斯賜斯環兮
邀我相漓之干兮

公之還謂常還兮獨不謂公害彈鼃冠斯傳于驛尚行
于鵠何以居之宰臣曰難豈無雞舌輔以麋丸于逵于
蛇與鼃為羽翰豈無辟水枕以橋門于顯于印與士為
芝蘭天子曰咈唯才是論胡為虜天驥而秦之闌胡為
虜隋珠而籍之彈厥居惟閑厥立惟胖斯佩斯還兮畢
我鼎彝之殘兮

南有刺序

南之竹木草皆有刺也竹之刺利於草木之

刺利於竹又有不刺之刺利於木者焉故作
是詩也

南有刺蓐又有刺竹有刺竹矣無刺蓐矣彼竹何族有
刺如簇蹴之者^{去聲}疥天委^{去聲}彼酷誰使尔蹴尔疥誰譴達
者蹈足恚者反目斧斤數數自貽伊蝮天道好復況利
於竹

南有刺竹又有刺木有刺木矣無刺竹矣彼木何族有
刺如簇觸之者^{去聲}衄天委^{去聲}彼酷誰使尔觸尔衄誰譴達

者鼓腹觸者裂肉斧斤叟叟自貽伊毒天道好復況利於木

離之水補序

離水自興安而西至於桂林又自桂林入于東海離者離也居官不得行其志思與離水俱離此以去焉

離之水浮兮粗資以汰離之水激兮頑資以淬離之水清兮垢資以灑離之水潤兮槁資以漑

離者離也胡離乎東而西其會永言西大不泐而匪靡
資弗沛四有一逮亦孔之快

離者離也胡離乎西而東其邁永言西隘不覲而瀨靡
資弗礙四無一逮亦孔之漑

逮固罔功不逮寧罔罪誰謂匪註又誰謂無悔離哉離
哉固云忒哉寧固云慙哉離哉離哉固云夬哉寧固云
駸哉

續南有樛木

有序

為有才者進以自累不若不才者退以自遂
作也

彼樛者木輪囷其質既幹既跋匪枉伊直時乎倒植自
卑自抑膠轕蟠屈形詭貌譎於時好乎弗適

彼樛者木擁腫其資既節既枝匪立伊歆時乎倒垂自
抑自卑勃窣離奇根恬蒂怡於性元兮弗迷

弗適時好暴客不到暴客不到軼出乎危道弗迷性元
靈主長存靈主長存馴入乎妙門危道我出妙門我入

有謂我為兮不才之物不謂我得兮不才之力

續南有嘉魚

有序

為無實有名又自銜以自戕作也

維離之方維丙之穴誰幽爾宅自濡自沫惟性是適與
汨俱入莫厝其斃亦孔之黜

維夏之時維孟之月誰浪爾跡于哺于歆惟物是詠與
滴俱出莫稅其罽亦孔之拙

天予之骨其骭如鮫道與之肉其糜如鯉非媾人口可

昌我齡奈何薄味徒爾休聲麴氏傾意獻人動情雖被
相欺以機械亦由自暴其神靈彼名有累兮彼生吾生
奚用兮吾名

欽定四庫全書

緣督集卷二

宋 曾丰 撰

五言古詩

自是妾之罪

妾生昭君村國色所少逮固羞著紅紫亦懶傅粉黛少
時母教嚴稍稍攻組繪針機參大玄綫道得三昧坐貧
姑貿遷不就村市僧竭去長安遊幾入未央賣其如主
市司所好與妾背一金陽不醅翻謂索價大永言妾所

挾未道美無對猶欺西蜀錦豈數南海貝厥價誠不廉
其理獨何恠况妾雖索價似亦非分外售不委自然於
妾無利害古女不尚工肯犯出閫戒追思妾初謀輕發
良獨悔雅負傾城姿來為倚市態人得賤眎之自是妾
之罪

勸客

勸禽思夜林勸客思夜衾夜衾良獨薄夜林良獨深林
深暖氣聚衾薄寒風侵氣暖猶比翼風寒更孤簪猶敢

謂勸客曾不如勸禽

題會昌蕭帝巖

出門疑浪遊轉眼逢傑觀山斗路將窮脚歌行小緩信
筇捫石根恍若得一間崦嵫欲上吞渾沌疑始判豈期
蛟擘開或者雷劈斷洞轉一曲關蹬道鬼為棧懸巖百
仞餘僧巧屋其半其旁磊蒼崖其下蟠碧澗峯迴若相
朝水瀲若相喚蘿虯百年枝松剝千尺榦溜皮鱗逆生
蟄孔根倒貫三十六洞天往往此其冠或傳帝所栖其

說涉漫漶意古隱者徒僑此避秦亂圍棋或者書不覺
歲月換斷編何處藏但有竹可汗殘局何年終但有柯
欲爛疑似姑置之杯酒酬賞歎移之家山旁破甌視浮
宦上疏乞鑑湖故事吾可按悠悠天聽高此計卒未
辦意外今獲茲巾幘可小岸況在大化中醜好俱是幻
有暇得嬉娛親遊非汗漫

小憩月華寺問智藥眉山兩公遺跡

韶溪經其前漕溪緯其背崢嶸兩溪間月華得吾愛開

山不知誰立屋已忘代寺碑兵火餘斷石猶未廢始得
智藥公與法作無礙梁題烟煤中殘墨猶未敗始得眉
山公與寺為不壞餘詩謾贅疣滿壁空蘚芥我生遲百
年來與眉山背鳥為嬌人聲山作傲物態老大堂頭僧
曾受智藥戒試從言下挑要看急中對寺以月華名中
包法沙界方當月未生敢問華安在得月而忘華堂頭
大機械更和月也忘始出機械外

贈別曲江貢士李安之五羊相訪

南中今士風似不如古厚我來長杜門無日無人扣蠅
頭利相關蠶足爭屑就夫君何為哉所見乃獨否曳裾
投長箋過眼驚大手晴空一鑪薰細與勘關鈕鋒芒已
經磨筋骨猶欠揉舜峯久裒精韶石俄茁秀蔚為曲江
公未有繼其後君姑事文章亦可傳不朽小徒為秦張
大止到韓柳緬馬洙泗間道統相受授點破石頭機塞
斷天下口三傳至孟軻軻死寂寥久我少有志焉老來
晚窮狗回頭萬物初著脚諸子右乾坤化氣形火者水

之婦語孟發乾坤鑰者闕之壯鑰通闕自開火徹水俱
透要令方寸間可與太虛偶事業出箇中始得免於陋
聖門二三子十僅能八九倘便出一塵是謂吾儒首古
人責善心敢以謝吾友歸來有餘師莫擁掃門帚

遊三洲巖

井序

淳熙十三年九月二日偕嘉禾張橐遊三洲
巖歡賞之餘次為古風屬延平田澹書焉刻
石置巖中

南中豈無巖三洲蓋其傑竭來五羊初滿聽行人說今
乘急雨遊吾屐不遑蠟遙觀似舜峯迫視疑禹穴數畝
腹空洞十丈口訝豁恍焉入其間眼亂欲生纈寬處晃
如堂狹處黝如闥彎跼角門隈屈曲磴道劣土膏兀參
差形象鬼塑涅人立雙足歌獸臥半身沒爛斑漩狀文
鈎鎖玲瓏骨伏撐突如櫺斜柱岌如稅倒懸雲乳凝上
溜井花冽地空聲殷雷石鹵色蒸鐵暗中漏微明圓處
留小缺倒指數不勝百恠千萬譎遊人得娛嬉造物費

曲折靜言萬物初含氣如聚沫流者氣之融峙者氣之
結時於融結間故故出奇絕巨靈盤古機雖妙不容測
要之幻虛空無乃等戲劇居人玩視之過客三歎息瀟
溪艤行舟眉山稅歸轍籃輿相踵來瀟洒祖無擇三公
走龍蛇千載磨歲月夫誰四三公吾學亦云未引盃酌
髯丞未老其勿輟朝夕神所遊古今理之窟從渠好事
人而酷嗜尤物

遊三乳洞

并序

上中下三乳洞水出下洞成溪莫窮其源深
處有石可為鐘磬遊玩次屬工採之市歸為玩
海上有三山嶺南有三洞洞中天下奇少有相伯仲探
源冥莫涯窺底窈無縫流泉沆瀣融滴乳氤氲凍譎姿
互形容駁理交錯綜推原開闢初造化窮妙用瓊田鬼
為耕芝草天為種初為仙界包後與沙門共我生嗜娛
嬉茲賞乘空惚幽跡重窮探古碑難疾誦翫心猶未厭
行色已先動山容笑相留水聲泣相送后土不愛珍入

眼亦云衆形模怪莫名留作諸天供
琤然鐘磬聲獨與雅意中重價酬
良工採以歸自奉倒箱妻兒爭堆案
賓客弄那知含韶音未與登禹貢清
廟千載勲釣天一塲夢何如臥巖間
天性得自縱物情我平章我事誰折
衷物我兩忘懷宴坐聽禽哢

遊香山寺

井序

丙午秋出晉康試院之次日太守陸載之邀
遊香山寺登豁亭酒三行雨大作輕轎不可

乘乃步以下戲載之

二年官番禺簿領未嘗隙一月客晉康偷得閒兩日太
守宣公孫雅有好客癖相邀乘午陰共往扣禪寂前驅
破暝煙磴道十餘折草蒙百年街屋倚千仞壁板捫到
上頭兩眼眇萬物賓主小夷猶杯盤大狼藉毋多酌我
醇我渴嚙泉瀝毋多食我肥我饑啗芝茁邇來傷南烹
頗復費北藥坐客笑欲顛詩人命能薄勸酬互譴譁問
答交戲譁車馬林間馳衙官松下喝使君倡茲遊風景

業已然何當學謝安更有攜妓樂流水誰與彈行雲誰
與過雨來風薄之其勢飄以忽藍輿不及乘急著下山
殺林梢溜點巾石罇泥浣鞵帛點效殷懃破袖爭拂拭
我叱帛點休巾鞵豈所惜泥非世間污溜是塵外汁點
浣不厭多愈多愈清絕

遊桃花臺寺僧指似葛仙翁煉丹處

昔為仙翁宅今作梵氏家桃花太俗生釋老安取耶物
元出平等人自分品差我來與時違有桃却無花舊來

花片紅散落為流霞中有結實者往往成丹砂仙人食
之餘鷄犬爭輒譁翔鸞久霄漢廢竈空塵砂殆欲從之
游龍髯不容挈擬作武陵記恐謂漁父夸坐許老上人
晚煙煮春芽

壽廣東潘帥

太初談赤松中古說黃石笑策導引勲鬚鬢白成黑金
華得道人綴自仙之籍雖因習墮緣久悟空為色泥丸
至丹田益著半生力若為鬢與鬚白者日加益陸展餘

染方豈固未全得老聃生世初鬢髻頭已白公白纔十
年視聃遲半百紙帳掛齋中竹奴歌臥側染亦無所施
方元不須覓或疑白之根勃窣蟠胃臆太白緣搜詩少
陵為憂國根未能中艾華寧不外茁根花理固然抑復
容有說春淺未多溫臘顏有餘冽紛紛破萼梅袞袞放
花雪融結上鬢鬚愈白愈清絕少於仁用功晚以靜為
德靡坐廣平堂歸住子雲宅臥聽兒吟哦起視孫戲劇
頤間瑩生珠眼底光盪墨鬢髻從白盡不失壽筭翼切

母痛著梳更勿閒事鑷長留與人看知是老仙伯曳裾
客盈門我獨有詩癖齒頰與公俱倒指滿千億年年賦
壽詩歲歲為賀客

壽周樞使

四首

元氣自子始入申為至清況在申中央其氣猶粹精金
風冷颼颼玉露寒泠泠人間物莫當夜墮文章星
一氣清絕處坤元直西方公生受西氣戲筆俱文章北
門逼西清金僊侍玉皇凡遺不朽蹤便是難老方

四時秋為陰凜凜兵氣衝公始稟此生今坐制百戎雖
握生殺柄以不殺為功長爾塞草青自然臉霞紅

一元發於春萬物收以秋公轉播物鈞元氣在筆頭頤
指役漢將願言似留侯功成早辟穀壽與喬松侔

用山谷新詩徒拜嘉之句為韻賦五篇報尹直
卿

吾土歐陽公一代不數人文星蜚上天山川效其珍劉

侍郎郭翰

相望出才藻豈不新所恨狃時態未躡公後塵

自唐大歷後二百年無詩太史豫章公崛起江之西雖
葩卒以正況淡時乎奇織錦良獨難但要得錦機

名以懶故無業以病故疎但夢華胥國而友無懷徒百
詩一不補十口九欲癰人所共棄者子獨何取歟

天下文章家吾州兩前輩內翰周擅其宗大監楊為之

最更有龍圖公詹氣節蓋新代請從古端叅去作臥下

拜

藍田丞姓崔華陰丞諱嘉二子不擇祿雖陋看作華我

但欲藏拙享此亦已奢所期謹回旋老驥避少駟

送贛士劉虞卿赴省

名舜元

贛豈無傑才少有中我律君以謁求交相見便相入贛
豈無傑觀少有投我筆君以題求詩相許便相及況加
精業齋亦入緣督集豈其蚤緣深姑以臭味密初知若
久要三歲如一日質穩不受浮疑非自贛出辟雍諸偉
人大抵舊相識其高固天資所揉亦氣習誰使地塊高
未放天馬逸令聽鹿鳴歌催赴蘭省急行時梅欲華到

時梅欲實願言子如梅華實俱蔚蔚筆頭驅六丁榜首
爭甲乙青衫拜白頭人子願始畢脩途莫之量前輩願
所立

送陳通卿赴省

名景
年

閩南江西人蓬梗適相會妙齡華髮身氣味適相愛問
其先世誰意者了翁派肯學喜文章綽有風流在自餘
鍛鍊方猶鼓我鑪韜自餘組織工猶勘我機械一投百
無悟始契終不外漕臺開棘圍非金必沙汰聊為八韻

諧輒擅諸生最明年動春官再捷驚晚輩御樓晝刻長
入赴集英對危言嬰龍鱗穩步踏鵬背儻來幸勿驕歸
學遠且大

送梁藤州廣譽解組還朝兼簡葛子章盧伯真
乾道淳熙間隨牒公之邑我閒時曳裾公喜常折屐過
從未多時情好已相得功名打門催馬首遽湖北一為
盧溪留便作弱水隔邂逅五羊城恍如不相識初驚面
顏蒼徐視髭鬢黑欸曲遍諮諏交游半悽惻一別十五

年種種事非昔更著一回別又豈勝歎息梅雨逗譚機
槐風速行色愁邊更添愁客裏仍送客笑騎五馬歸郎
省平步入天南九萬里誰得礙鵬翼語離當有詩頌德
似無益清暉百尺虹方廣千丈碧高蓋山下松極樂巖
裏石一切奇傑觀無不入我集轉眼雖寥寥猶厯厯
厯公歸為致言久疎頗關憶老葛少年盧亦有風月癖
唱疇舊知音來往今掃跡相逢問樽齋依舊四立壁

送汪永豐被薦解組還朝

等之考滿同他豈不云便顧寧圖此君曾不鄙吾縣小
折彭澤腰仰看督郵面何以剗爾繁胃次剛百鍊何以
活爾瘡筆下丹九轉堂上琴畫彈境中枕宵奠那知彼
魏相不謂吾宓賤物議任物情處之以無辨吾事盡吾
心持之以無勸木秀風必摧水清石自見論定無後言
政成有公薦萬萬字民心聊復書四卷

謂製錦
管見也

概之六

經然意視文更善擬置黃麻中專美學士院萬萬字民
功聊復碑一片槩之輿議然實視聲更羨擬置青編中

專美循吏傳行車氣駸駸臥轍心戀戀中年滿考回太
傅獨班見採珠有相酬懷玉母自銜我以無聊歸茲其
不勝羨已已長杜門行行穩乘傳相望道何修相送足
何殿缺然物將誠聊爾詩當餞

解后南昌簿孫正之劇欵既別聊以記所期者
三秦擅淮右三孔專江西鼎足立世穩文匠詩宗師吾
生亦太晚流風殆誰歸龍泉劍之精夜氣貫斗箕今其
為三孫鋒芒不能輝大孫學如鍼鑽到罅隙微小孫筆

如雷挾雨驅虹蜺弟兄時輩中羣雄望風雌我新幸且
識其仲字正之才調驥歷塊襟懷鷗忘機每見必樽酒
謾延率移時劇醉尚正色太平輒愁眉萬事談未了心
隨白雲飛其如總是客而更劇語離各著古人鞭滿意
酬所期離合有自然姑置天一涯

貞女篇

廟在南
康縣

女生願有家奴嫁理所宜出自父母命奴豈敢固違既
許吳氏子又許蔡氏兒但有一女嫁乃受兩聘儀為奴

父母者不知意何斯業已許吳聘復許蔡已非況卒蔡之業而復吳之歸奴羞殺不行父母固強之勢不得自由出門行遲遲欲哭聲不出欲語舌不隨投江以自明庶免世點嗤寧作有行鬼無為不義妻皇天上無極后土深莫涯區區奴之心惟有此水知劉歆空裹頭馮道空捋髭或以雌視女汝猶不如雌

朝議大夫管氏瑞芝堂詩

并序

朝議大夫管公攝漕事之暮月自府中攜家

人遊臺治泊晚乃歸其夕芝生堂柱閱三日
被命除漕遂以瑞芝名堂

太空生兩儀羣有函一氣飛走動植中往往有常類凡
與常類殊疑瑞復疑異縉雲開國公來攝飛輓事乘閒
攜家人縱步至臺治三杯晚酣風一笑春盎地夜闌堂
左楹蒸出芝茁帶人不慣見芝疑信初異議詔除九天
來郵傳三日至笑開芝函看默與芝事契始攝今即真
雖疑亦云瑞那知瑞在人小物未為貴我公胸次寬殆

與天地似所臨和氣俱萬彙一一遂江湖淮浙閩兩稻
多不槎廣東十四州樂國逢稔歲擺極萬里黃厥瑞吾
駭視煌煌楹上芝茲特瑞之細貽書彭元忠好作瑞芝
記

為增城丞張元輔賦博見亭

東山未為高坐覺魯之小更上泰山巔天下不勝眇公
作如是觀所學胡為料父兄自磨礱師友相揉矯猶恐
眼未高著脚湖海渺纔疑輒徧參一悟百高了今簸增

城糠冗不廢舒嘯數椽立江頭萬象生木杪揆之高了
機撫掌成獨笑或指羅浮尖又出鳳凰表常試登羅浮
鳳凰僅毫秒洙泗聖人門等級蓋不少擡頭空仰高瞑
目誰見曉能拍十哲肩不失速而肖要策參之勲守約
始為妙更與約相忘混沌安得竅公餘勿哦松回光返
自照

題公安宰黃叔萬魯齋

淵中見潛魚床下聞鬪蟻從知聰和明反累目與耳孔

門三千人十資九其慧竟失道之歸端為慧所使回以
愚故專首得一宗旨其次參好修與回亦無異受裁魯
有餘學道心不二頓悟聖授機萬理付一唯試推學之
功但自孝而始設令太聰明視孝緒餘爾公安黃令君
少鈍壯而銳不受青雲吞猶坐黃卷累開囊包物初落
筆灑胃次鋒芒莫敢櫻古劍發新礪駸駸進未休冉冉
老將至以魯揭其齋蓋是少時事云胡不輒更無乃有
所為新收汗馬心蚤作蟄雷計音容成老翁情性復孩

稚其友曾搏齋適是參苗裔家學世相傳魯者鈍之謂
生平事事遲大抵與君似雖遲幸勿嫌正以鈍為利

謝葉英州惠石山更託尋置絕品者

梅雨酣夜眠槐風豁朝起應門疾傳聲外有夸娥氏背
負小崢嶸云自西北至浣櫛出問誰迺拜公所餽太行
王屋山轉徙到牕几直莖根倒盤混沌竅中啟歸墟孔
道訝神瀆溜痕泚兩生大丈夫二老古君子識面喟無
從豈料不我彼一見三扣之琤若相諾唯燕閒與之俱

庸洗吝與鄙相愛至忘形相期至沒齒山容若吳辭猶
有勝於已瀟灑舊主人雅性無所嗜隕星拾宋都浮磬
收泗水尺寸靡不珍要作補天計適分上帝符來守真
陽壘山使聽指揮石侯具供擬三間敞鈴齋四壁羅玉
峙况纔下車初貢者來未已新傳渤海東五山失其二
神牛驅六丁挾送函丈裏風骨天下奇非直我輩比聞
之喜欲狂悵莫立自致千金豈容慳再瀆那得忌岱輿
第一峯割愛良不易負嶠蓋次之何當更分似

奉解水石紛

江深寂無聲
旁岸時瀟瀟
推蓬細聽之
迺是石間滴
固知水之鳴
多出石所激
如何厭喧人
罪水不罪石
吾在水石間
雅性雖嗜默
鳴非吾敢嫌
激非吾敢責
奉解水石紛
兩各適其適

謝廣東經略潘直閣席間分貺李濟墨

竈煤不忘遠
膠汁寧傷清
永言李廷珪
墨法能爾精
滴瀝甚點漆
錙銖輕連城
胡陳梁浦張
後出聲錚錚
敢與

相頡頏江西老潘衡李家颯以顏中興有雲初未空天
下伎已擅湖南聲公重與物交所厚墨客卿摩頂相許
意垂髫久要情信手暗摸索心已權重輕乃言濟妙處
而有祖典型端如坡借力獨惟衡主盟笑捐數寸玉增
我雙眼明呼童詔羅文折簡延陶泓來陪客卿遊欣然
兩相迎涓涓井花落黶黶江煙生始堅苦莫揉俄熟恬
無爭更請毛錐子三益相友朋丙吉魏弱翁姚崇宋廣
平剛柔各自稟勲業交相成我無換我鵞手初不工草行

僅能蚯蚓勢強學蛟蚪形暗投漫費壁誤點難成蠅不
若舊主人八法俱縱橫敢持以回旋筆頭貯南溟題詩
答公隙草疏排姦萌聞健賦歸田投閒註遺經已重人
託之濟價日夜增況不為濟者何當經品評

五羊食荔枝龍眼

素聞嶺南風今假嶺南館窮秋餘夏蒸初臘借春暖披
衣汗流衣握簡汗流簡似登頭痛山而坐身熱坂誰其
善解紛荔子雜龍眼滿盤隨情堆入手信意揀強餐飽

為期一澡得三浣疑吞玄冰丸復燕飛雪散猗歟兩清
姿南多北何罕天曾無全功地固有偏產猶記初客閩
饜飮腹頻坦一離餘十年口與南味斷渴者易為飲志
得而意滿兒輩舌太饒平章味長短

癸卯豫章貢園酬贈教授張安叔

吾與子所居相去二百里建昌吾之鄰其實同郡耳已
久聞姓名不專為科第論心雖所期舉足若相避只今
緣檄來車柄初各指去矣信所之偶然集於此相聞始

相逢同調更同事談諧出肺肝議論到骨髓首遺華篇
至以我馬班比愛我豈不深恐非切磋意麻姑山氣偏
土物半仙劑枸杞雜黃精猶未躬厥美清淑之所鍾一
代文章士翹翹南豐曾挺挺盱江李豈獨華江西往往
國之瑞誰其繼此公或者屬吾子更傾胃次高莫道筆
端是

欽定四庫全書

緣督集卷三

宋 曾丰 撰

七言古詩

鏡香

樂安縣治之西故有蓮池久漸湮廢令尹趙
公子季溫善恭艾穢疏清築亭其上取李太
白荷花鏡裏香之句扁以鏡香

凌波仙子濃淡粧六月鑑湖夜乘涼低頭貪照廣寒影

開口失噴清靜香花縣草池漪且綠疑自鑑湖分一曲
若為仙子不呈身無乃主人猶負俗新逢好事公子來
十年水鬱一旦開動搖倒影弄金彩勾引回風生麝煤
傑題所扁危亭峙仙子涵恩勿私喜百里黔毗屈者伸
非徒愚汝數仙子長安得暇遊昆明紫橐初開有餘馨
主人顧影頭尚黑仙子聞香眼重青

題宜黃鄒聖言宜雨亭

謂海
棠也

佳人一代傾城色和氣醺酣更塗澤
臙脂凝汁覺差濃

頤頰盎光疑大赤水沉浴罷餘精神蕩去人偽還天真
東風吹開巫峽雨西子化作陽臺春

壽富陽宰

余寓富陽東郊孫氏之西爽樓九月四日是
為邑大夫慶誕之辰不果闖賀用課古風侑
以尊酒盆菊為壽

秋途琴劍留東垞午夜齋房發西櫺協氣橫流太白嶺
祥光上屬長庚星詰朝廉訪太丘長三千珠履羅芝庭

誕彌厥月衆所賀止或泥之豈忘情飲君以蜀州竹葉
之酒食君以酈縣菊花之英按英探酒非俗事敢煩素
素相卿卿既多且旨奉以進乃賡載歌坐而聽酒有香
于以却君之宣髮英有味于以制君之頽齡爬搔黑頭
戴大豸磨切齧齒吞長鯨二十四考相唐國一百六歲
侯羅城貂蟬何如外望重鍾鼎不屑初心輕拔脚歸尋
耕釣盟割襟為笠蓑為羹一洗重席兼珍腥吾身吾口
已中清露頂洒風漱泠泠更與赤松俱長生

題永豐吳尉當山亭

家居所至與山對官居所至與山背眼中悔失真崢嶸
得其似者宜加愛尉仙三令姦胆寒突兀數椽苔清閒
誰橫荒壘簷以外自覺幽趣山之間有一段清無點俗
當山也是清題目不道尉僊心更清杖履當車蔬當肉
甲申大水二首

吾州背山面江流一雨便有泛溢憂况復梅霖倒江海
白晝洶若龍移湫眼看上流沒高樹下流屋廬渺無處

君不見甲子之歲至甲申如此災變已三度

歛水震蕩方流東婺水南來塞其衝二水爭雄屹不去
孤城匯為河伯宮經旬水落流民復身在不用嗟無屋
君不見去年金人破淮壩城郭千里無人烟

題項聖尹竹齋

之君命屯有孤辰之子德孤無同人天遣之君友之子
賓主相忘無彼此出牆春梢道骨輕侵書脫色天資清
客來面目挾塵土對君有頭不敢舉客來言語挾塵埃

對君有口不敢開坐聽一賓陪一主夜雨秋風相爾汝
主人養高賓養虛九天上與神龍俱

同張隨州賦會稽朱子雲席上丹桂

月娥施朱小留殘天風吹上桂樹端葉猶強項護故綠
花獨多情染餘丹夜來誰借修月斧和根剝與凡世看
世人不識天上種醉眼恍惚竟溟漫我嘗浪作折桂看
驚見似與丹窟般主人視花孰風韻等是姓朱俱可觀
況逢問字載酒客不妨為花理杯盤賞音莫憚腕欲脫

花到夜深不禁寒

稽古堂

今人不足與之謀心向三都以上遊有集可明經子史
無秦難別夏商周心融口笑先儒泥一萬餘言解三字
粹精還我聞未聞糟粕從渠味無味懸知書者古之餘
稷契皋夔讀何書猶期立脚羣賢上更請回頭萬物初

題黃萬安治東樓

樓面自東如擇對景隨樓面若相會眼前獻狀有龍頭

脚底垂機可鵬背坐躋百里東風中起望長安馬首東
府寺有人能北事乾坤無處不東風

五雲閣

為黃萬安
肅父賦

一合乾坤羅萬象中有連天雲錦帳分光日月兩輪間
聚蔭神仙十洲上盤紉錯繆天上無若為雲錦如許都
媧皇鍊石補天了倥偬不及收其餘織女得之資以幻
手與目謀生燦爛使君寄下名還祥令尹收為公退翫
登臨輒翫罷輒忘令尹胸中自含章製錦猶餘五色綫

歸朝可補堯衣裳

正月雨雪

少陽當進猶自抑老陰當退猶自激
煦煦纔融地出青
颼颼又肅天生白一曝十寒權在天
春行冬令風弄權
我問天去天已遠
懶能更上訟風篇

吾郡之望羅彥方過聽以余有詩癖
古風特枉
傑作之貺不可虛辱賦一篇謝之

聲生於氣詩之體於氣要窮所從起
事制于義詩之理

於義要窮所從止一元開闢三才矣萬世綱維十倫爾
我初傳此無上宗君今示我未到工習中周召次畢公
筆端雅頌餘國風不容陰陽作窮通直可天地作始終

寄題夏椿年樓

廣寒韻度中央質故侍仙娥新見黜高天委氣得金行
平地拔身成玉立月下風前為誰香諸郎一詠翁一觴
功成寄語邵氏子有西樓後無東堂

問月臺

主人詩豪寄於酒萬象無非酒之友主人酒豪寄於詩
萬象無非詩之題若為詩酒興俱發平時泛愛今一割
不問其地偏問月月不長如日星然乍望乍朔作晦弦
要之缺者多於圓主人乘風踏鵬背方在急流俄勇退
似月之明居以晦舉酒相邀傾酒酌問耶對耶此其際
收光反耀照其內妙與道俱不容喙

題三衢汪學士聽雨軒

公家如許好昆仲不數河東舊三鳳床數對語無限春

簷滴關愁不成夢馬援看鷲始回頭知機恐不似少游
看鷲機落聽雨下雖悟已輸公一籌

贈豫章來子儀言詩

少年氣宇要自恢見人賦詩謂為才出入常將筆裝懷
中年心地要自息見人哦詩謂為癖起居常把口掛壁
子儀倡誦得意詩句中勾我已嬾機多年抱渴滿意沃
半世稱雄望風雌詩源始自葛天氏三人投足歌牛尾
萬象包羅八曲間國風雅頌其流爾八曲不幸世不傳

傳世僅餘三百篇漢唐作者代角立庶幾老杜氣渾全
本朝詩數江西派黃公太史為之最大成未集夷惠行
具體猶微顏孟輩派流到今嗣者誰青出於藍吾子儀
拄杖初擔教門出便敢喝佛罵祖師我當拗折君拄杖
大家俱以背為向能出二十四人前更超三百五篇上
題永豐鄭丞梅澗

分陰分陽天得清生水生木清降精懸知梅與澗為一
交涵互養清難名客來強立請題目擬之萬物無一足

巢許立身今古高夷齊受命乾坤獨主人氣與梅俱移
平淡之中餘崛竒藍田松竹須品題今年隨牒梅勿疑
主人心與梅俱化高潔之中餘蘊藉瀛洲風月須摹寫
明年入朝梅勿訝獨不見淇竹主人衛武公出相周家
了勲庸老矣歸與奉從容主人與竹俱高風武公與竹
為不朽萬古淇澳詩一首主人有以為梅壽我請置之
淇澳後

小立顛灘崖石

崖石崔嵬千萬狀舟人來往篙其上數十年間人已非
百千劫後石無恙吾生修短不自由短中自有可以修
五言七言句外意千古萬古江東流

舟中書懷

孤蓬轉徙空隨牒一出侵尋費三月厭從夢境作寄居
欲赴鷗羣填見闕我且戒塗兒挽之畏糧又趁蒲帆西
初心猶幸江神信後計不教兒女知

舟行過龍驚洲舟人指似桃花林滿山爛漫

一團烟火百十家一叢林木千萬花浪遊那料有奇遇
似入武陵眼生霞詩人多愛疑可賞舟人多忌戒無往
中途還未免迷行初意得無成妄想漁翁禪伯花所私
成仙成佛未可知花今於我有大造六幅歸帆春水肥

送陳制自富沙守京口

殿上舊開醫國口閩中新出活人手亘野桑麻水旱餘
連村炎火兵戈後飢得以食寒得衣名為之父杜為母
公為民賦閔雨詩民為公立遺愛碑古人祈天翦爪爾

今守禱佛燃臂誰充其不忍寢以大德之難忘特其微
東閩人怪去何遽南徐人怪來何暮油然無心出岫雲
去來遲速隨所寓漢相無人不曰歸韋賢未老何時去

贛縣向宰座上見綠萼梅主簿程開老相勉賦

詩

素與百花少相諧醉眼時為梅一開嶺南嶺北幾十種
人所常見非奇瑰中有孤根別風骨白金鏤蓋玻璃臺
白華紅萼雖傾國但恐紅非本色來逃紅歸綠未到真

與真相近亦天德化工厭駁會還純華萼併教同一白
題游德昭壽藏名曰復庵

劉伶未死先荷鍾自負上超無礙法死則已焉埋謂何
東坡猶笑未為達之君之學齊死生穴其吾屋屋吾穴
嚙日殮霞容有功馭風騎氣得無訣歸歟歸歟彼大通
復哉復哉此虛設

題滄洲畫趣

一身超忽白雲表雙眼低回白蘋杪沙隨風捲黃莫涯

草與天連青未了，摩詰雪中幾麋九。詩寫其真更留殘，
破除桑落斗升後。收入鵝溪尺寸間，想象訾家聊寓目。
指顧瀛洲方策足，中人宜在瀛洲宿。中宵夢在滄洲浴，
覺寫兩洲為一軸。馳譽丹青從謂俗。

題黃舜卿雙溪閣

山無背宅宅何勝，門未納溪溪是剩。一閣羣飛若見招，
雙溪蟠屈如回應。有酒不容閣生塵，無詩莫與溪寫真。
秋碧澄寒石齒齒，春黃漲暖風鱗鱗。有如此水皆詩思。

半酣還饕客之技氣之濁者客勿諱主人胃中有涇渭
味之美者客勿矜主人胃中有溜澠辨入涓滴太分明
醉遊汗漫真混成客與主人俱忘形

過秦和赴主簿鄧楚材豫章貢園之約

福建人才古鄒魯文章師匠道宗主餘子姑作尋常看
此公僅能一二數太學頡頏賦爭衡凌雲之氣擲地聲
鯤鵬誰礙天南去麒麟猶落地上行南昌傾盖恨不早
西昌扣門喜欲倒風月那容酒絕交江山不許詩在告

宦遊同調能幾人相逢莫厭情相親言下甘心聽苦口
鏡中白髮催青青

題饒德裕三益軒

過從義要如膠漆琢磨功要如玉石二者于茲有一偏
雖過聖門未之入德裕耽儒今二毛一軒灑落僅容膝
詩書執禮不放閒直諒多聞誰較密仲修國老曾鼎臣
各於三者得其一曳躡相迎下榻留冒雲蒙霧不知濕
松梅竹裏凜不凋形影神中冥莫逆問答小參文字禪

賈誼升堂馬入室更能尚友古聖賢
蘭移其氣金移質一綫溜作吞天濤
十丈花成盈掬實擴充未下反約功
軒今所揭乃其適顏淵復禮老歸根
今揭吾知猶欠易

題劉武翼息齋

天地一從開闢始左旋右轉長不已
詰所以然氣使之君獨不為氣所使
平生由氣今自由三平二滿過即休
千里收回渥洼馬十年養熟瀉山牛
本來無動那得靜
關著一毫還自刺雖任鵲安頭上巢
更防人打耳邊磬

應童子科歐陽文成覓詩漫以塞責

廬陵童子謂姓李臨川童子謂姓王二子讀書選德殿
氣吐虹蜺口翻漿六經諸子成串落天子喜之移御床
奏對首肯去目送青衫黃牒恩異常江西得此二童子
後生氣倍聲名場前聞但有晏元獻今繼者誰其歐陽
身軀眇小膽氣大齒髮幼艾言語蒼況能大書開龍蛇
一字欲作千尺強明年試罷春晝長低頭拾官回未忙
馬蹄輕踏百草香鴛花助喜酒助狂長裾短刺傾侯王

早著歸鞭紫故鄉我其候之螺水傍

贈南豐胡國華

軍山未信盱水屈清淑之氣相盤鬱天地有時不關防
古今何代無人物道德大成文小成君小成者精逾人
問我江西派從此南豐不是儒家子

劉文叔見贈回贈一篇

我詩求我渾沌初君詩求我糟粕餘低頭小叅有頓漸
撫掌大笑無精粗誰收六律入三類更斂八風歸一噫

四時元自五聲生無聲敢問詩安在

送留尚書再守贛之一年移帥豫章

贛農雖嬾連歲豐贛囚雖黠連歲空農囚今昨性豈異
今守蓋與昨不同鬼窺莫見活城手酒澆不下憂民胸
十年五度看易守萬口一辭獨歸公公几兩來亦兩去
前去殊邦今本路德公吾與軍民同軍民未解吾細諭
向汝思公公復來今公去汝汝勿慮僅隔一江千里間
豈忘三任五年處軍民雖諾猶動情不忍江頭送公行

淚隨贛石順流下碑在巽門前面橫千里和氣散萬里
一城春風分十城但疑贛人送未了洪人又送朝行京

辛丑大水

天公哀此生人苦潸然出涕灑下土五晝五夜涕不已
平陸成河山作渚是方為邑本窪下今者之變頃未覩
何止人家水半扉或壓或溺遍處所居家老稚幾為魚
夜乘一葉投山塢雖知此邦禍可免頗念吾廬歌莫柱
朝登山巔聊放目流尸蔽江可勝數何處奔洪之所擠

一旦至斯辜非汝天公用是涕愈流陽侯正自喜且舞
我願天公且收涕憂之反傷亦奚補但令老眼開日月
蒼生自然得安堵

題曾見卓此君軒

衣冠濟濟弟若昆詩書纚纚子若孫容有玉立人照門
得無玉立物照軒軒外清涼別乾坤一點俗塵不得干
其間蓋有此君存此君根性抱歲寒初交可作久要看
主人對之忘朝昏茶鼎烟中鑪薰燔酒樽陰裏書帙翻

坐探物初窮道原中有所得不自尊與此君結終身驩
莫逆之意寓不言行藏相約無背轅數猶未偶姑屈蟠
峻節孤標老丘園天假其時忽騰掀鳳鳴龍化駭觀聽
功成不受聲利吞白雲深處同歸根

吉之南門外見木芙蓉爛開

小春催出傾城色笑倚牆頭若招客芬芳猶帶秋風殘
婀娜豈宜江路側詩眼驚紅狂欲呼熟看似細又似粗
花神留為菊後乘天意遣作梅先驅

豫章上游生市前江中洲上至德觀側柏樹甚

老

何命之薄彼哉柏豈無生處生于石老去根猶強自爭
春來石豈能相尼蛟龍拔入盤重淵雪霜放出參九天
至大至剛劫火後彌高彌卻妖風前道人淡嚙得吾味
久馭清風騎紫氣吾骨到今猶未蛻庭前自適西來意

題鄔季文送清軒

主人曾次風韻勝萬象皆傾如聽命開牕凝目立相招

霽月影從溪響應神迎氣送煩此君拜嘉有何咎殷勤
斐儿蒲團千兔頰茶甌酒椀一爐薰

改秩注縣西歸過上饒見太守同年莫郎中

集英殿前始相識公已策名上通籍銀章朱紱爛映身
鑠我青衫黥無色上饒城裏重相望

平聲

公已厭直辭周

行皂蓋朱轡烟當眼鑠我墨綬昏無光浪說同年兄若
弟升沉不翅雲泥異分疎胡越敢尋盟義重丘山肯忘
勢一麾初守虎頭州差池不及從之遊僅收劉公一尺

紙堪比漢家千戶侯
鴟青今襲陳腐語
持以掃門應勿阻
遠圖要覓進德方
近効仍求為縣譜

題吉州聶倅談風月軒

黃堂指顧了凡最
紅幕奔馳了苛碎
更無可了別駕翁
贏得徜徉是非外
未有可偷風月天
崢嶸新起東偏廢
風含渾沌竅裏音
月弄光明藏中態
吹開雲雨天益高
照破山河地加大
兼之足以荅公餘
妙處何人同領會
無酒客有詩相酬
有酒可無客相對
主酣客醉舌俱饒

說到無聲無色界髮難恃細併毛融骨不禁清連肉毓
目不信為山河影耳豈信為天地籟主困欲眠客且歸
不容耳目寧容喙

南康劉尉於廳事之東開軒曰清瀨蓋取其前
松聲然也

坐曹在西退食東一間然爾萬不同彼無乃俗飽吾聒
此不勝幽醒我聰不律不吕自中節非夔非襄誰傳宗
意其金沙鴻磅礴否則銀漢鉤穹窿開窓即之辨所以

老松不受風所攻松莫之禦非自戕風無所爭不相容
二者無心一有感自然成聲闕大通混沌之竅君之耳
松風觸處天機融聲之真者非固有况復流歸形似中
潺潺瀾瀾蓋其似得真忘似軍新功更收吾耳聽以氣
一掃從前真似空

謝新淦令徐信甫至贛相過

永嘉之重自晉始積至本朝始多士大科異等固非常
文章道德相角掎淳熙癸卯徐令君相逢欲執弟子禮

聊將舌本吐寸機輒自脚跟參萬里藏中觸處隨光明
言下從誰得源委國子博士陳先生初受皮膚終骨髓
孤蓬今轉大江西猛象欲踏黃河底但恐黃河深更深
水浮太空空浮水畏糧學道僕馬疲歸家落照在簾裏
自有餘師更求師棒頭打出乃其理況人胷中各法門
陳君韓子吾柳子雖有心印不敢傳恐君呵佛罵祖爾
題王欽州子澤雙清閣

馬蹏車轍前門外江聲山色後堂背左手持盤右把杯

家人怪問翁何在小閣崢嶸負後堂圖書左右翁中央
一塵不容犯眼界萬象無計逃詩囊蚤作從渠醉名利
夜卧從渠夢朝市一詠之餘更一觴翁兮醉夢華胥氏

甘老堂

功名鏡裏猶黑頭誰子速之營菟裘四朝元老人姓周
掃三大字蟠龍虬元老之門幾從遊天上公子第一流
十論較之過秦優記室有勞無束脩郊霈異恩小相酬
過而睨之海中漚從渠進進吾休休胃中一壑復一丘

酒發詩豪不宜搜風月自與毫端謀木奴竹君歲所收
不翅漢家千戶侯歸哉老矣餘何求詠蜜啖蔗味悠悠
孤松野鶴無春秋

陳良臣之子正功肯學能言求余印可

學探玉甃千仞井筆扛龍文百斛昂歸根可以後冥莖
發刃難於先肯綮點鐵要之便成金即心是道道是心
一案孔門重勘結小圖為賜大為參

題趙州通判陳日華二友齋

吾初丞小邑誓與松竹為膠漆公今丞大藩誓與松竹
為金蘭維松若竹有何德和公玉立成三益矯矯摩雲
性天高亭亭傲雪心地直風月外吾吾強哦其如松竹
偃蹇何橫江太守風月主公與平分無乃多況有眼
筆有口大與松竹相諧偶張陳漫浪耳熟初管鮑綢繆
歲寒後三友莫逆俱歲寒猶遺其一非簡驩四科參偶
不與班孔子無容心其間愛參初不異問顏寄語梅仙
勿街寬

前高涼推官陳漢臣惠佳作索俚編不可虛辱
授之後集古律矣復課數韻語謝之

太虛生氣氣生風風又生聲詩在中國固自性情元具足
何當學問更加充形容草木魚蟲意雖妙猶為墮於藝
雅頌聲音召陰陽聖賢道義包天地句拙莫謝來章工
尚深自養細自融和順積中鬼不見英華發外天無功
癸卯九月末韻吉大水

秋江次第落到底半夜忽如潮湧起方陵屋山遽城頭

卷三
已失洲背况沙觜五月小潦似未傷九月大潦疑非常
感召之心上所謹推原厥咎誰其當一部麟經幾書異
敢可叮嚀今執事休責漢公賢不賢且論堯具脩未脩
題陳宗元立齋

人言禮起於太一吾言禮止于皇極强名皇極體何如
卓然萬象中間立流言鼎鼎三十餘古人有立君可無
克己未追顏所復過庭猶學鯉之趨五禮同歸一中爾
何當中立而不倚膳肉無來孔子行皮冠不設虞人止

區區行止未足輕擴充更可輕死生黃墟在前始易簣
白刃垂下猶結纓一有所立百無抗底柱中當拍天浪
千古不磨立齋名泰山北斗在頭上

贈江宰彥通

富沙耆舊江先生方冊之中久聞名今識其子長安城
中年狀貌老典型居官不翅冰玉清未嘗一出清之聲
臨事不翅冰鑒明未嘗一示明之形牛刀初割琴初鳴
市稀善履鮮善烹江華百里農桑毗陰受令尹生與成

尚不能窺豈能評兩部使者識理精循吏政出吾六經
一元動盪萬彙亨不以能稱乃真能交章疾置聞朝廷
明公歸重蓋如此素履後修想俱偉立朝致主從今始
廊廟規摹寧出是貞觀三錢一斗米房杜傳中無可紀
事業文章非異軌誰云解此不解彼學詩反幾我開啓
生平言行詩之理游泳於詩未知爾國風雅頌興賦比
類發於情止於此六義同歸一宗旨包涵萬象無涯涘
騎驢覓驢殆忘已子歸反聽收初視三百篇中參到髓

題顏慶遠三友亭

天一生水清之精天三生木清之英他清可備吾題名
不得精英未為清顏子園中亭突兀遠橫一水近三木
取其近者共所欲太清也自生毛骨餘豈無友非歲寒
歲寒之友天數三主人更與三者參天合人合情相涵
四清之清俱不凡

題胡邦仲霜節堂

此君骨固有虛室六氣薰酣無不適所稟寧非道之質

此君貌固能圓機四季變更無不宜所立寧非聖之時
其表無方裏無物妙與大道相出入清節凌霜特其一
秋風夜雨君曰噫名我字我敢問誰無乃未為大相知
守節雖賢一於正聖人達節百其應君亦能賢亦能聖
姑於節論猶失訂標致孤高所持勁伯夷獨立君制行
主人加愛又加敬根器渾涵所成迥顏子屢空君盡性
客子三嘆更三詠

寄題項聖子盧溪書院

中興天子旌義門榮光猶足昌弟昆家庭衮衮義子孫
下相郎君開義塾美意非徒淑姻族鄉里烝烝義風俗
廼翁固喜兒讀書更喜他人與兒俱兒今不替翁之初
人人忠孝書緒餘初唐元勲幾卿相游學豈無他絳帳
姓名半出多顯揚河汾便是盧溪樣

嚴子陵

周家刑不上大夫法固不足禮有餘何人不願立朝路
未老誰肯甘田廬秦阮學士寘勿論漢嫚大臣眠如奴

逸民不出朝士去前有兩生後二疏世祖聰明失之察
待臣少禮多以法當時祿位列三公危似千鈞懸一髮
先生識帝貧賤時富貴何妨與共之云胡君房留不住
無乃平日窺其微龍顏之疎顧豈忍烏喙所伏那可知
初來高蹈疑矯世從後逆覩信知幾退身不勇公孫賀
明泣危機終自墮先生明甚勇如之天地萬物莫吾挫
將星羣立客星孤羣恐難調孤易禍帝座旁邊睡熟間
夢魂已在桐江卧將星耿耿亘今明不比客星明更大

欽定四庫全書

緣督集卷四

宋 曾丰 撰

七言古詩

梅隱 并序

永嘉士蘇慶遠號所居曰梅隱甲辰就太學
試與予相值次覓詩為賦長韻

君不見岷峨春雷江發源又不見梗楠秋風葉歸根時
中兩字萬物具他說不出吾聖門挾書來就辟廱試堯

舜君民得無意鳳山梅隱屋數椽區區無乃太早計淵
明出辦三徑資初不害結松菊知今君意與梅莫逆豈
梅亦具幽獨姿梅雖花早實亦早早恐少年遲恐老青
春誓不易歲寒歸伴梅遲梅却掃

壽陳龍圖

參差鴛瓦封清霜玉虬薦瑞初騰驤三山一夜應圖識
曉來沙磧堪褰裳瑩煌戟戶掛弧矢瑞氣氤氲結霞綺
帝令來作金鼎和趁得寒梅雪香藥精神照座如神仙

滔滔揮翰傾河源杜詩韓筆繼騷雅鳳髓鸞膠家世傳
皇皇轡駱輝鄉國春逐霜蹄滿南陌禁城龍閣儼圖書
班近天顏還咫尺泥書細札九天飛好看錦衣蒙袞知
亨時得路方平坦沙堤犖錯黃金羈年年愛日回南陸
慶壽階庭照蘭玉南陸仙翁識姓名星官曾見刊瓊錄

賦馬漕桂巖序

廣漕馬少卿於宴坐前疊石為山植桂映焉
潘帥書桂巖字揭之

岱輿山我東海頭招搖山我西海陬兩山相望幾萬里
月桂滿巔花長秋羅浮山我南海岸道取東西蓋其半
銜種非資化鶴功誰其有力移此粲廣東使者富民侯
函丈雖褊餘清幽眼前開闢一混沌牆角崢嶸小羅浮
侯睨羅浮吞八九摩挲縮地挾山手雷霆驟下震以驚
蟲蝓爭前負而走羅浮故與蓬萊連蓬萊新與羅浮遷
瓊瑤古木葉覆地玕珠老樹枝參天花環實娜涵沆瀣
天上那知在鼇背炎州浸作廣寒宮鮑肆薰為香積界

元戎大字蟠蛟蚪扁鵲為侯揭殊尤一麗山氏一蒼頡
幸自同與造化遊何當同與造物休

寄題劉漢英雙清亭

玻瓈橫眠蒼玉立不容朝市一塵入魚泳鳥飛自薦揚
舟往車來誰收拾主人瀟灑宅一區子弟何師受何書
馬遷史裏萬古具張說詩中四時俱詩編史帙一闕目
姑掇餘清清冰肉床頭拈出周易讀更悟太清清蛻骨

又寄題雙清亭

渾淪一段輕清氣天收不盡歸於地凝者為山融者溪
擘之可使凡骨蛻主人著亭溪山間心與溪山相往還
市朝有欲叩以事魚鳥不容入其關

題吳季章挹秀堂

造物鼎開新畫圖江蟠前後山負隅一塵不動鷗出沒
萬變無心雲卷舒主人倚坐扶欄立太清之氣交相襲
風煙席上毛骨醒文字腸中星斗濕說詩論史功日新
江山怪見無精神筆頭收拾珠玉去變為酸鼻河伯顰

填胃自有真瀟灑沃眼更何須外假景饒眼飽欲著書
書成勿示斲輪者

淳熙丙午夏陳伯英為知己入廣為幕賓暨秋
仲翩然而返取陶淵明歸去來中語揭其遊息
所曰載欣予聞之託于琴為賦連韻

伯牙家有焦尾琴朱絃長掛窻壁陰出大都邑初何心
直為鍾期舊知音玉軫調罷不自禁聲諧匏土革木金
試彈一曲萬籟瘖動盪南風鼓精稜長養餘恩到魚禽

齊娥趙女秋夜砧怨入離鸞別鶴深轉調忽落思歸吟
元亮歸歎故丘林粉黛候門玉差參卓氏心挑淚空淫
鐵脚豈受魔女侵撫玩無絃喜不任羲農遺意絃外尋
阿舒阿宣立森森大孫倚膝小捉襟上百千壽酒再斟
爛醉欲眠不脫簪大槐宮裏無升沉醒浮烟浦登雲岑
高山流水弔古今墨子從今突長黔

寄題劉淵甫可齋

君子無莫也無適聖人無固也無必行藏視彼時所宜

去就惟吾義之適吾道難莫難於權其惟孔子為能然
胷中還未有孔子寧墮於偏勿求全願為孔子可齋志
四可猶須省三未孟子何當周文王魯男善學柳下惠

遞呈餘干郭主簿子敬

時子敬攝廣東帥
舶二幕先余解去

謂吾多可失之雜與人連費或莫識謂吾寡合失之孤
與人傾蓋或莫逆南來豈是無過從一見如故髯簿公
文章未始要著語造化莫能與爭工半生蓬首黃卷裏
不如畧歎習鑿齒須臾已幸復明年咫尺猶思況千里

羊城虎城任竹伶梅嶺不遮夢逢迎隴頭梅月向人色
戶外清風敲竹聲漢廷用少公垂老在我者大官無小
餘干縣古簿書少赤子被聖廝兒擾餘功始可到魚鳥
了事猶癡仍不了笑人莫更為人笑我住巴山木之杪
急足往來數晡曉貽詩勿憚相揉矯吾人能有幾同調
題葉英州清白亭

一元之氣天得清推為覆燾萬物生四時之色秋得白
推為擘斂萬物成清白為德蓋如此我公何獨取于水

水生于天落于秋妙與萬物為終始公家清白世所無
俸餘僅有數卷書歸歟宴坐故溪上此心洞與溪水俱
取譬于水公之跡胷中公固有虛室清白一自虛中出
清至表表白畫畫上少能容下多嫉更居以濁守以黑
始與造化相出入

入廣豐倉領米書所遇

創意入倉稽斗斛乃逢兩鶴三頭鹿意者殆天假其衷
憐我清高墮於俗脩脩兩鶴雄與雌三鹿牝牡連一兒

本生自有山林在安用來遊城市為出山入市已失脚
况傍官倉疑更錯口與身為沒齒讎心因腹作終日惡
我歸徑欲追喬松爾鶴爾鹿來相從一為先驅一後從
共馭元氣騎清風

代人題瓊守歸疆堂

前朝列聖規模大雨露涵濡山海外椎卉之民半冠帶
恬不復他餘百載前守諸公方略偏藩籬漫浪耳目前
版圖之地半塵囂恬不復誰餘百年白囊新報潢池弄

詔公借我海南重金鼓戒嚴曾未動汶陽田已歸禹貢
功成不居頌者誰樂石雖堅有泐時亘千餘里兒童知
牢不可解去後思歸歟更了中原事抵掌挈還河朔地
竹書不盡帛相繼回頭今刻公之細

乙巳正月過英州買得石山

吾之好石如好色要須肌理膩且澤真成入眼輕連壁
吾之好石如好聲要須節奏婉且清真成入耳輕連城
閩荆江淮隨牒去豈無一二石佳處終之難得聲色具

飛蓬今始轉廣東英石不與他石同其色燦爛聲玲瓏
小山突兀百千重萬錢得之歸自奉稍閒更為山作頌

了頭巖

婀娜江南大小姑大姑從兒小從夫了頭如許尚從母
學綰雲鬟撩月梳諺謂女生俱外向了頭非有難婚相
來壻曰贅嫁曰歸固不敢請豈無望雲鬟久綰行且笄
長成不似從母時擬學小姑嫁夫去又恐夫蕩去不歸
夫去不歸安所仰終日望夫更惆悵不如老死作了頭

庶免春閨惡情况了頭休強笑望夫世間夢想俱是妄
題李克明依綠園

主人不制眼之欲買斷江天猶未足更開兩岸小乾坤
而種十州靈草木江中照見花木真詩中傳出花木神
片言隻字畧點化四時六氣長含春夢草未終俄夢蝶
栩栩羲皇上頭客未覺身居安樂窩那知園是華胥國
贈別石首尉胡廷直

士之所忌忌無末吾已與交不輕絕士之所貴貴有初

吾未與交不輕結歲在戊申九月間中都始識胡廷直
經史子集蟠屈胷甲兵錢穀瀾翻舌好賢先主未顧廬
負氣買臣猶詣闕姑調南昌一尉歸斗升可養子直節
餘功奮意筆硯間解后搏齋談不輟烹茶畧與論源流
秦未焚書道先裂學統况成八代衰向之裂者殆磨滅
紛紛唐士學古文僅僅韓公得真訣口傳心授門人誰
劉义皇甫湜張籍十人摹倣九失真訣中妙處容有說
射御書數學發蒙忠孝友悌士歸潔探微猶要善擴充

持滿不妨徐發越江出岷山根本殊風行水上波瀾別
茲其為訣不亦真韓公所秘吾乃挾君歸紬繹細自參
閉門造車出合轍更看蘭臺大聲華何如麟閣小勲烈
衛霍儻能恢土疆淵雲當為勒碑碣時有衛霍無雲淵
於漢往往未為缺

浯溪序

元次山頌刻于崖至本朝熙寧數百年無異
論一經黃魯直出意著語來者往往更相黜

陟紹熙改元四月二十有四日廬陵曾丰至
止按經據義會二公意而一之所以全前修
解後紛也

千古一碑得人愛來書碑後幾前輩相頡頏甚曾不饒
自混融之了無礙太平天子狃開元馴致馬嵬悔何逮
桑陰未徙宗廟安儲皇功豈不云倍君父恩重臣子輕
功至彌天皆分內靈武猶言權濟經京師何忍小間大
南內起居不遑安西宮晨夕無聊賴不沒其實豫章公

言者無罪聞足戒元結但持歸美心為尊者諱誰獨怪
歸美為頌刺為雅四詩義各有攸在一出春秋雅頌中
兩忘人我是非外竭來獨招莫逆魂樽中有酒聊一酌
誰能更解未艾紛石上有壁聊一疥

寄題左叔寶昆仲松竹書院

南窻晃朗宜春夏松竹與君為大雅雨雜伊吾聲灑灑
勸君讀書無苟且北窻窈窕宜秋冬松竹與君為大忠
風雜伊吾聲颯颯戒君讀書無雷同竹生受虛松受實

根氣性天道之質他人見疎君見密一薰舊染百俱失
風雨不移君讀書由松之實悟竹虛回首書皆糟粕餘
一真超然萬物初松竹於學機相觸學成終不負松竹
拔地摩天立於獨逃獨歸羣成更熟

題馮行之雙溪書房

鴈峯之水蒸若湘虎城之水貢若章雙水朝宗氣浩浩
諸生讀書聲浪浪葛溪支派小雙水馮君領會水之理
東西決流二本非左右逢原兩端是開窻觀瀾參浴沂

涵泳無往非聖涯水哉水哉不盡意歸歟歸歟有餘師
寄題劉永年桂堂

四時之氣秋氣清月之掬之水中精四時之月秋月明
桂之掬之木中英沆瀣蒸開黃爛漫分是羣仙清鼻觀
君家誰會術之幻乘夜入月移此粲微風透簾日透窻
老葉弄縹花弄緗翁在中央季在旁讀萬卷書字字香
顛闕四開香入體薰融人欲發天理鯉伋點參賢父子
傳芳後葉殊未已一枝五枝聊自詭邨家實家勿相侈

劉家正恐不免耳

題龍洲書院

西昌有洲龍屈蟠爪牙潤澤鱗甲寒桃花水肥意騰躍
似欲上與青天干西昌有士龍變化雲可以乘泥可謝
臚傳未放雷鳴春弦誦猶挑燈破夜作成況遇今趙侯
螢窻開處吞龍洲儒風相高踏鵬背士氣自敢騎鰲頭
縣前洲前年年長圖識會當應如響鴈塔固無過我前
雲臺更要人在人上

寄題仰止亭

并序

東莞董巖鄭君少修文業壯就武階巖烹餘
暇追尋杯渡故跡于其山創亭曰仰止志屑
潔也搏齋老人廬陵曾某推廣杯渡學為詩
以充君之志焉

廬陵江潁路窮處舟子不容仙子渡豈意一篙落手來
而資雙足凌波去睥睨大海如江然杯渡佛輕篙渡仙
休負知津惟我是且從登岸看誰先杯渡之杯人所怪

大塊中含幾沙界或云芥納須彌山細視芥焉杯則大
彼細莫細于一芥一芥要之猶有內彼大莫大于兩塊
兩塊要之猶有外內外相形費融會未忘所仰亭勿壞
吾細無內莫能碎吾大無外莫能載細大相融亡罣礙
何仰之有亭可廢

岐竹序

慶元三年季春之月猶竹擢萌於所居之乾
維出土甫一節別為霜暈連旋而斜上者四

復為節者三韋為寸者九蓋一苞也忽岐為
二日夜長苞稅而成竹小大不能殊以分卑
高不能殊以尺觀者噩然類曰瑞或曰妖予
非博物士莫別也姑從其實目以岐竹既為
之銘并賦以詩

漢關之茅茅之英豐城之劒劒之精雙茅雙劒龍變化
一陰一陽數生成我家穉竹老龍殼中而岐之相犄角
玉爪蚪為天矯枝金鱗蛻作爛斑籜豈無他處生乾宮

震象為竹乾為龍震吾知是乾之變竹誰謂非龍所鍾
瀟瀟聲韻蒼蒼色余懷二主殘精魄不受冰摧直養剛
無容塵入虛生白夷齊坐看萬物流不負知音王子猷
半夜葛陂雷雨作二疏欲去終難留君不見震為龍又
為竹竹又為龍幾翻覆學人笑問玉版師孰是本來真
面目

勉王堯章歸

并序

王堯章後余一年入廣東兩試不利余歸三

年得邑西廣堯章踵至又為後科計未決復
東賦詩送行勉令且歸

君氣如鵬不受羈君才如駿不受韉摩天厯塊少自許
臣視文潛雌少游場屋小銛大還鈍掇第未酬方叔願
二炊無日足斗升一擲有時輕百萬買臣一出今幾時
非取富貴誓不歸倚廬固禿孟母髮織錦更攄文君眉
鳳雛知我君之友相屬逢君試相叩豈有五年山上山
未嘗一日口中口

送陳次畢劉德欽王才卿赴省

梅花爭送君出鄉
蘭花爭迎君入場
兩花之意豈不厚
非與喜機適相當
集英對罷燕聞喜
紅迎紫送餘桃李
問燕無恙相識初
與鴛莫逆半酣裏
中年得意非少同
未老更下不朽工
氣驅萬物挫於筆
舌挽三江吞以胃

題安子承讀易堂

卦辭爻辭易之註
孔子讀之悟其故
彖辭象辭易之疏
孔子作之志其悟
懸知孔子大悟時
太虛中不掛一絲

與易為一自不知奚以卦辭爻辭為渠無孔子大機械
所恃囁嚅三尺喙象彖爻辭從領會其如猶有卦辭在
誠使時習能絕編安知日新不忘筌著脚還超九師先
回頭更勘三畫前

送廣西經畧應寺丞被命改除歸朝奏對

蔚林妖血掃已除桂林剜肉補未蘇玉清玄帝右是顧
金華散僊南其驅下車首問民所苦踴躍近前爭告語
醋緡苛斂重傷農嗟鈔抑敷良困賈小斷於獨大叫閭

一呼痛拔百蠹根連營坐卧老將校萬里耕桑長兒孫
足醉於濕殊未醒奏函頻以中州請十行洒渥下九天
兩踵騰輝輕五嶺五更黃道煙霏霏追隨列宿朝紫微
三寸舌沃萬乘渴一一編摩為野史

長至壽廣西提刑吳大卿

無量壽佛今壽皇家傳室授不老方九轉丹砂一仁念
函四大海為壽鄉仁氣所覃莫非壽椿松龜鶴不足當
三公九卿百執事一時幸會俱遐昌公於九卿蓋其傑

向獨年少今未蒼嵩嶽尼山吐符日長虹失色歸文章
骨相巖巖松梅竹精神凜凜冰雪霜黑精青女殺氣重
終握斗柄持天綱十年伏驥起北漠萬里飛鸞度南湘
掌中名是風憲筆實與萬物為春陽二十五州人所禱
萬口一詞壽而康君不見夜來南極星轉芒又不見朝
來南極日轉光日星所會有所應西州耆舊循南荒百
神奔走翊誕慶萬象森羅印徵祥南人耳目習南事壽
公之意何以將南極從古星不老南極從今日夜長

寄題閣皂陳元禮蒼玉軒

道山飛落江之瀕
山中草木海上春
鴻濛盤成碧樹勢
沆瀣蒸出瓊芝津
辟塵有許猶未愜
更著千百青璘珣
兩三也足況千百
后土不自珍其珍
從坤受質外負直
與乾同體中含純
表裏洒然相肖似
亭亭物外佳主人
鳴珮琅琅夜步斗
握圭挺挺晨朝真
音韻危峭壓霏霏
威儀峻節排風塵
卷班歸洞門不鑰
世間望之自逡巡
遼城脩脩鶴有道
葛陂矯矯龍何神
主人與客俱變化

同為玉皇案頭臣猶餘栖鳳未僊去不有冥鴻孰情親
題陳晉卿願齋

鯤鵬振翼初九萬梗楠歸根終數寸穉須有發老有收
養之各要適其分三兒誦書翁卧聽生涯固有何所營
功名羞從竒道取文學厭與時人爭誰揭此齋函二意
翁養其恬兒養銳今雖異養後同功一本莊椿三鄰桂
免解進士應致遠過晉康見謂以上文字而忤
諸權要聽讀藤州十餘年得旨自便賦詩贈行

錢塘江湧千萬奇收為詞氣吞虹蜺敢與九關虎豹違
蜂芒蠆刺攢一時或疑宜州城上人不歸桂林山羅千
萬怪收為詩膽吞渤澥敢與九疑魑魅對瘴雨蠻煙塵
十載誰料儋州海上人猶在一尊三酹古藤陰少游陳
笑君日新還過韶石聞舜琴混融奇怪入古音韓子老
來潮陽歸後固自文章功更深何當道德終不負初心
王元賓之子經紆道過我晉康臨行贈別

乃翁於我松梅竹之子於翁芝蘭玉藹藹薰薰仁義容

便便坦坦詩書腹向來相訪魯東家今來相訪洛南涯
飽參禪覺一宿別精進射功三年差家傳自許已跨竈
庭對相期毋媚奧馬蹄厯塊且徐行鵬背負天終遠到

邀肇慶府卓司法杰

吾性太率故多可吾調太僻故寡和門前屨滿率所招
榻上塵生僻之過生平交際二者間燕處官居長若箇
斗升新幸飽自聊朱墨素慵閒亦頗客來未始不相迎
問無恙外徒默坐與君傾蓋輒破愁終日對談至忘餓

驪龍頷下無數珠
僅容竊拾二三顆
江山句裏眼何高
金玉性中天已大
雅挾承明金馬資
來為郡掾得無左
蒼梧水口綠一灣
紫石巖前青數朶
其間風月分外清
公餘足以供閒課
萬古一語思無邪
道盡詩家大關鎖
大川三百小三千
源委吾須俱勘破
下從樂職沂商那
上自國風沿楚些
江西社冷況嶺南
喜得君來與磨礱
謝安不笑貧家風
相過當更具茶果
話到更闌不欲歸
德公德操同床卧

廣東黃漕巖老改除廣西帥過郡送行

久酣蓬島飽瀛洲他水他山何足遊
郎宿自閒朝北極使車誰枉指南州
浩浩湯湯廣諸海無人能與相融會
天遣公開東計臺會融諸海新詩內
奇奇怪怪桂諸峯無人能與相會融
天遣公開西帥府融會諸峯古文中
進衣忽遽吾民事退食從容吾道計
詩文平淡潮柳州公則視之為末藝
包籠天地孟軻篇收管山川馬遷記
仰觀俯察易象真更勘畫前精入神
未為三公効燮理

先與萬物歸彌綸事非戰國而來事人是義皇以上人

道人彭永年來番禺過訪相約歸日遊閣皂

雅性苦無他嗜好山之佳處吾皆到江西山半入詩中
點檢怪猶無閣皂吾家十世江西居南來始得閣皂圖
堊文橫斜水曲直煤汁濃淡山榮枯燕閒指顧圖之上
神遊滿意酬心賞已空沙界無大千那信滄溟有方丈
詩仙往來白雲鄉惟沈廷瑞伊用昌畫簾卷舒納夜月
金鼎開闔吞朝陽兩篇之外有餘景孟陽摹寫得要領

陳孟陽有賦閨皂詩或云圖是無聲詩猶將夢幻對泡影搏齋或

是武夷曾道人未必非老彭相逢恍惚似前世一笑春容話長生大道一成百無恐仙家猶被死生動逃却莫如徐佐卿山行未免飛矢中道人詞詘不敢磨殷勤約我遊青城橫江孤鶴飛且鳴便是道人出相迎

參政翟公之孫東廣機宜德遠惠書若詩以能問於不能久之愧虛盛意敬賦古風謝塞

高廟中興初十年大參內制餘百篇心聲之發動遐邇

手澤所存傳子孫得其傳者孫之嫡參自道根至枝葉
一元生二二生三萬特取千千取百詩書其髓易其精
左右逢原筆縱橫公先聞道非後進我後獲仁豈先生
知津問津蓋有得教玉琢玉其何名玉雖不以石作使
以磨易磋亦其理春秋以來有師承博約之外無宗旨
風行水上舊為文雷在地中新復禮

贈江西瑞上人至南海袖詩相過

六祖求衣從嶺出六祖得衣從嶺入半夜抽身不露機

回頭解擔猶留跡上人家住江之西僕僕而南何所覓
雅意真成為衣來衣已不傳那可得假令為法不為衣
江西自是大法窟挑動上人熟機關潮音激越箭鋒疾
空還即色色即空佛便是心心是佛心源一了千佛空
底用區區祖衣鉢達磨大鑑無兩身震旦天竺非異國
眼高海僅小泡浮道大嶺纔微沫結往來始不計東西
出入今何問南北要知飛鳥杖筇因直為翫山觀水設
玄鑰無一勘不同觀翫之中容有說山數須彌水西江

須口能吸芥能納吸猶不盡納猶餘未足與談上乘法
南海水况多於江上人無口若為吸萬一猶有口可開
我先判斷上人舌

清江何子發自荊湖宣撫幕客罷歸道出晉康
為投詩索報勉意塞請

南北新來尋舊盟江淮襄漢又休兵召還開府諸元帥
請遣游談幾老生指上琴聲忠憤激腰間劒氣血冤腥
君不見老范相知小相沮橫渠自反高自許三略六韜

付擲捐中庸大學歸含咀未遑盡發千古聖道機猶不失為一代士宗主

壽廣東提舉韓判院

君不見天上之老人夜夜增芒爛如銀又不見柱下之老子年年換骨輕如紙辟穀餐霞得長生老子前身老人星我疑公亦星之精精神雖實骨枯槁老子區區似徒老公生富貴老更好初隨鷓鴣翔中都一麾一節今南驅為溟渤中有蓬壺雅懷信在蓬壺島非要瓊芝與

瑤草公原自有長生道藤床紙帳二十年上至泥丸下
丹田孰非可為地行仙十月十日祥雲凍賀客休投龜
鶴頌倚雲自伴寒禽嘆

倚雲
亭名

陳刪定日華除廣東憲取告中志深攷古之語

因扁齋曰考古齋

東都有人持漢斧南國無人繫周圖未從刀鋸宥者三
先即桁楊聽之五五三異念同一仁聖賢典故公日新
心從仁上勘得道筆與民間點為春百未試一刑幾厝

忘其勞績况恩數天語疑由公出然公心默與天通故
持平已遂留何須責難未了歸可圖課效九章三章外
游心千古萬古初剖斗折衡還未可非繇蓂莫矯叢脞
結繩之外畫冠餘作古幸無嫌自我

賀德慶陳倅生朝

光祖字世德本貫
興化軍二月二日

無伏無臘壺中天不煙不火壺中仙壺天固自遠世界
壺仙還自結世緣昨夜壺公山外望壺公駕鶴隨仙仗
逃身下降唐謫仙襲姓前生漢丞相四時之氣春為冲

誕彌況在春之中一段乾坤奇特意三朝文學老成風
通守通班蓋其寓澤民致主酬吾素收拾平生塵外遊
追尋疇昔壺中去春秋過隙了不知甲子循環浩無數
壬戌仲春隆慶因老留上藍與璉老往還余續
後至相過浹旬言別

山立堂堂古白眉一龍一象殿江西春秋多寡弟兄是
朝暮往還賓主誰藤坐蒲團邀二妙其間著我成三笑
無夏無彞跡自融不儒不釋心相照遠公送出如欲留

陶令辭行如欲休殊覺上藍今勝踐少分前輩舊風流
過南安接孟使君辭警策多矣復承遣持追惠
詩遂足度嶺所賦梅還謝萬一

坤元分氣謂無間南崖北崖纔尺寸地寒地暖差之半
乾元分氣謂無頗南枝北枝能幾何春早春遲差爾多
我來幸未全失策南枝早退不留跡北枝晚出猶弄色
驚見北枝問南枝寒香羞受時輩知隨清風入孟郊詩
詩之視梅類高致孟之視詩渾細事至大至剛浩然氣

其詩拔我塵埃餘其氣充我情性初吾自覺吾非故吾

